

# Balua gba Polo pi omabhuka na gudhu na Filipoi

## Eli na kalanu

Polo aye nani balua inde-e pi \*omabhuka na Dadjua na kalanu inde ani a'o nani e bhú putu-o, bhú ndu doto na ngámá gba okpála na \*Loma inde abhú Makedonia-o. Aní aye balua ango-o me ani nde bhú tikpu. Li nedhinga inde ani adu lie me bua ani nde angamba ka nagnu inde li \*obhelesi okpála koko na Dadjua gba Ebhe adu ague ne e-o, la di bua ani atsia alu bhúlá má gba ka onasuno na eu inde adu bhú Dadjua gba Ebhe inde abhú Filipoi-o.

Engú inde i ti da nau lie má gala bhú balua inde-e, a ko nagie heni pi omakilisito na Filipoi ngubula makiso inde u atima nani e pi ani ngu nateteke ani bhú ongu gba e ko. Polo aha nedhinga bhomu ngu nato masi bhú omakilisito na Filipoi ngubula me u andala bhú kulu gba Ebhe-e de, abana u adu ato mbolo lie li ndu uo hana-o.

Balua inde-e agama 'ngu kpekpeke pindji djali, naziba, nadu bini di ne 'ndjá bua inde bhú \*nabhuka a la di-e mukobho gba makilisito. Aní atsia asuno la di mukunda na kpekpeke inde li Polo adu ne e pi Dadjua na Filipoi-o.

Ongbengbe ongu inde bhú bhuku inde-e ngae inde:

Eli na kalanu 1:1-11

Engú atsia Polo kpi e kpi 1:12-26

Mukobho inde bhú Kilisito-o 1:27 – 2:18

Mabundja inde adu pi Timoté ngauo ne Epafolodite 2:19-30

Nalila lio ka obhulu yala di ne okpekpeke 'ngu inde ngago 3:1 – 4:9

Polo ngauo ne obi e na Filipoi 4:10-20

Eli na soso 4:21-23

## Polo yi omabhuka na gudhu na Filipoi mayi

**1** <sup>1</sup>Ngama Polo, bhú dabili bini ne Timoté-e, ya yi yi mayi. Ya ne obalise gba Yesu \*Kilisito . Ma aye balua inde-e pi ndu yi \*omabhuka inde bhú gudhu na Filipoi hana, pi yi \*obhelesi okpála di ne pi yi okpála inde ngateteke kulu gba Ebhe, ndu yi hana inde akpetse liyi bhú dabili bini ne Yesu Kilisito-o. <sup>2</sup>A ayo me Ebhe 'Dyi ní, bhú dabili bini ne Ngámá gba ní Yesu Kilisito suno bádha bhú 'bu gba o-o pi yi, amba u ha di \*guo 'ngu gba o-o pi yi.

Polo agie heni, ani atsia ayo di Ebhe ngu omabhuka na gudhu na Filipoi

<sup>3</sup>Ma ngagie heni pi Ebhe, ndu nedhinga hana ma ngabundja yi lie-o. <sup>4</sup>Ndu nedhinga hana ma ngayo Ebhe lie pi ndu yi hana-a, ma ngakpi djali. <sup>5</sup>Ma ngagie heni pi Ebhe anga yi akpetse liyi ne ma bhú nakpokpo \*Bádha Ngali , nayie bha bini li 'kpi na kalanu yi abhuka lie, akolo makolo pi mbia inde. <sup>6</sup>Ma ambila ndjindji me Ebhe inde akpo nani lita bádha kulu li bua yi-e, anu bha ne di ne kalanu, ani tsia bú soso li 'kpi li Yesu Kilisito agó lie-o. <sup>7</sup>A ndjindji me ma bhundja bha pindji ndu yi hana mo-o. Pádha de, anga bua ma abedhe ne djali ka yi, anga Ebhe asuno bádha bhú 'bu muma di ne pi ndu yi hana, ngubula me yi teteke ma nedhinga ma nde lie mbia inde-e bhú tikpu, di ne nedhinga inde ma ngakpokpo lie ne angu ma hana kukulu 'ngu pindji Bádha Ngali lie-e, kala okpála nakodho mangimbo-o. <sup>8</sup>Ebhe mbila hana me, ma ngapa kukulu 'ngu me ma ne mukunda pi yi naali. Mukunda inde ma akunda yi ne e-e, ayie ka Yesu Kilisito.

<sup>9</sup> Ehe inde ma ngayo Ebhe pi yi ngú e ngae inde: ma ngayo Ebhe me mukunda gba yi-e ne bha ne kalanu, amba ateteke yi me yi mbila engú na kakulu ne lele maka yi ngadu lie sunda yi-o. <sup>10</sup> Abhomu-o, yi tsia mbila di nalo obabadha 'ngú. Ma ngayo ndu 'ngú bhomu-o hana ngubula me ekpi li Yesu Kilisito agie lie lie, bua yi de du má ngilili di ne me ehe bini na sisiti adú bhú yi de. <sup>11</sup> Nakolo li 'kpi angu-o, nadhuku gba yi-e du ndjindji bhú angu gba Yesu Kilisito, amba okpála dhogé Ebhe, u toko di ani.

Polo akpi djali anga u ngakpokpo Bádha Ngali gba Kilisito

<sup>12</sup> \*Ondaise ma, ma akunda me yi mbila ndjindji me ongú inde akolo li ma-a, amene mangbo me Bádha Ngali-e yangba ne kalanu. <sup>13</sup> Ka 'ngú angu-o, ndu osudha hana inde ngalila eti gba guvelenele, di ne ndu okpála koko hana ambila me ma bhú tikpu kabula kulu gba Kilisito ma ngamene e-o. <sup>14</sup> La matá di-e, nau ma me ma bhú tikpu-o, ato masi bhú \*omabhuka bhelé li kpadji gba Ngámá gba ní-o. Uo matá ne tsulu ngú nakpokpo Bádha Ngali-e ade.

<sup>15</sup> A na paká me okpála koko ngakpokpo Bádha Ngali gba Kilisito-o, anga u ne 'ngbé bua li kute ma, u ngakunda nagu ma. La-a, okoko di ngakpokpo engú gba ani-e ne bua bini. <sup>16</sup> Obhe ngamene ne bua o bini bhomu-o, ngamemene anga u ne mukunda li pabili gba ma, u mbila ndjindji me kulu gba ma li bili inde-e, a ko ngubula me ma akpokpo Bádha Ngali, amba ma suno di pi okpála me a ko kakulu 'ngú. <sup>17</sup> Okpála ma de apa 'ngú gba o kalanu-o, ngakpokpo Bádha Ngali gba Kilisito anga u ngakunda me ni du nagu ma. Engú inde u ngakpokpo e yie li bua uo de, u ngakunda me ma zu matá likabhu bhú tikpu ei ane mane.

<sup>18</sup> A mene 'he bini de. Belegu u du akpokpo Bádha Ngali gba Kilisito ne \*siti bua , i du di-e ne bádha bua, Bádha Ngali angu-o bha naae nganu ne kalanu. Kaka-a, ma ngakpi djali. La matá-a, ma adú bha ne djali, <sup>19</sup> padhá de, anga ma ambila me ndu okpekpeke da 'ngú bhomu-o hana améne me Ebhe kobho ma, anga yi ngayo ani ngú ma, \*Bu Bhobua inde nani li Yesu Kilisito atima e-e, la di ngateteke ma.

<sup>20</sup> Engú inde ma nga'o 'to ma 'to e naali-e, a ko me ma ahá galikpe numu pi Kilisito 'kpi bini de. La-a, mbia inde-e, maka ne ndu nedhinga hana-a, ma abhuka ne bua bini me, ma adú bha bini nadhogé Kilisito belegu ma du bhú mukobho, belegu ma kpi makpi. <sup>21</sup> Padhá de, anga muma-a, ma du bhú mukobho-o, ehe inde ane ne engbé-e, a ko nadhogé Kilisito. Ma kpi makpi-e ane la matá ne bádha. <sup>22</sup> I du me nadu ka ma bhú mukobho pfla doto ei nde ade kpadji muma na ateteke okpála-a, ma mbila kpadji bhende ayo nalo e de. <sup>23</sup> Ma ngadho 'bi sunda ongú bhisi bhomu. A nga lima naali ne nayie pfla doto inde ngubula me ma nu du de Kilisito. <sup>24</sup> La-a, nadu ka ma bhú mukobho-o ndjindji kabula yi.

<sup>25</sup> Ma ambila ndjindji me, a la bhadi moko, ma du nga matá bhú mukobho, ní tsia du ne yi bhú dabili bini ngubula me yi nu li kpadji gba Ebhe-e ne kalanu, amba yi tsia kpi di djali li kpadji angu-o. <sup>26</sup> Nedhinga ma akoto lie bhú tikpu-o, ní tsia du matá ne yi bhú dabili bini-e, yi atoko Yesu Kilisito naali ka engú inde ani amene e muma-o.

Yi lu kpekpeke bhú nabhuka

<sup>27</sup> Engú inde ane la mane-e ngae inde: a ayo me nadhuku gba yi du li lelele maka li Bádha Ngali gba Kilisito apa lie-o, ngubula me, belegu ma go natsia yi, belegu ma go de-e, ma de dje me yi alu kpekpeke ne mabhundja bini, ne me yi ngalila ndu yi hana \*nabhuka gba yi inde alu pi Bádha Ngali-o. <sup>28</sup> Yi adjé tsulu ka obhulu yala gba yi-e belegu de bini. Bhobhomu-o asuno pi uo mbamba me, ngauo-o, u angita, la ngayi-e, yi li kpadji na mukobho. Ebhe asuno pi uo ngae. <sup>29</sup> Padhá de, anga Ebhe suno bha bini bádha bhú 'bu gba e pi yi ngú nabhuka Kilisito de, engú bini, ani asuno bádha bhú 'bu gba e pi yi ngú nazu di likabhu kabula Bádha Ngali gba ani-o. <sup>30</sup> Yi ngagu bhomu-o ngua gbele inde nako yi au me, ngama-a, ma adu agu e-o. Yi la di ngadje me, mbia inde-e, ma nga bha ngagu 'gá.

Yi kə liyi ne kuto maka Yesu Kilisito

2<sup>1</sup> I nde lie me yi akpətsə liyi bhú dabilí bini ne \*Kilisito-o, bhobhomə-o ngaha angu pi yi. A mo-o adí! I nde lie me aní ne məkənda pi yi-e, bhobhomə-o ngaha angu pi yi ngú nakpata kpadji gba aní-o. A mo-o adí! A na paká me \*Bu Bhobua akpətsə yi ngae. A mo-o adí! A na paká me Ebhe la di ngasuno bádha bhú 'bu pi yi ngae. A mo-o adí! 2<sup>2</sup> I nde lie mo-o, yi bedhe bua ma ne djali bedhe li kpadji nadə, ne li kpadji nadə ne məkənda sūnda yi, di ne li kpadji nadə ne makpətsə na kəkəla sūnda yi. 3<sup>3</sup> Yi adú amene engú na bhayiki bhayiki de. Yi adú nabhi 'kpa yi pí mbulu yi li engú de. Engú bini, yi kə liyi ne kuto, yi də nau okpála koko me u ane yi mane. 4<sup>4</sup> Kpála ne kpála adú bha bini natsia engú gba e makpe de, engú bini, a ayo di natsia engú gba okpála koko uu.

5<sup>5</sup> Yi də bhú ka yi ne ngua mabhundja li Yesu Kilisito adə nani ne e-o.

6<sup>6</sup> Belegə u aviti nani lie ne Ebhe-e bhú dabilí bini-e,  
aní kpo nani 'ndji e ne Ebhe de me ni də ndə 'kpí hana maka aní-e de.

7<sup>7</sup> La-a, aní a'o ká ndə 'ngú bhomə-o hana,  
aní akolo bali, u atsia azu aní kpála-kúti.

Ndə okpála hana au me a ko kpála-kúti.

8<sup>8</sup> Aní akə matá lie ne kuto,  
aní amanga Ebhe akolo bha makolo bhú nakpi ka e,<sup>a</sup>  
inde u agí aní lie li kulusi-o.

9<sup>9</sup> Ka 'ngú ang-o, Ebhe ngae makpe a'e'e aní ne abhúla nane ndə ohe hana.  
Bhú bádha bhú 'bu gba e,  
aní atsia a'o 'li li aní, inde ane ndə 'li hana.

10<sup>10</sup> Aní amene mo-o ngəbula me ndə 'he hana inde abhúla  
di ne pfla doto di ne asa doto,<sup>b</sup>

kikita lipəkə o kuto kala Yesu  
ngú nadhogə aní ka 'li aní-o,

11<sup>11</sup> amba ndə okpála hana kpokpo mbámá me Yesu Kilisito ne Ngámá.  
U mene mo-o, u tsia dhégə di Ebhe 'Dyi aní.

Yi də maka zi 'ke pfla doto

12<sup>12</sup> Kaka-a, \*ondaise ma na məkənda, maka yi amemene lie gəmə gəmə-o, yi manga Ebhe mamanga. Yi amánga bha bini aní ka de djila ma de. Engú bini, yi manga aní la matá ane mane nedhinga ní nde lie ne yi bhú dabilí bini ade ko. Yi mene kulu liyi pi Ebhe ngəbula nasuno me yi akobho, yi mene kulu ang-o bhú dabilí bini ne nakə liyi ne kuto.

13<sup>13</sup> Padhá de, anga Ebhe ngae makpe ngamene kulu li bua yi ngəbula me yi də nakənda di ne namene ongú inde ngangá li ní-o.

14<sup>14</sup> Bhú ndə kulu hana inde yi ngamene e-e, yi adú nadi mətokono de, yi adú la di ne kpeke 'bhə de, 15<sup>15</sup> ngəbula me kpála bini aú engú na sisisi napapa li yi de, di ne me yi də libhomu hana ndjindji, amba yi də ne ongisi gba Ebhe, ongisi inde li siti 'ngú nde bhú o ade. Yi ngakobho bhú ká osisisi okpála na doto inde. Yi də bhú ká uo maka zi 'ke inde ngasə masə, 16<sup>16</sup> padhá de, anga yi ngakpokpo pi uo eli na məkobho. Abhomə-o, li 'kpí li Kilisito agó lie, ma adú kala aní ne gindaginda kabula yi, anga bhobhomə-o asuno mbámá me kpéke kulu inde ma amene e bhú ka yi-e, ma mene padhá de. 17<sup>17</sup> Engú bini, \*nabhuka gba yi-e, a ko makiso inde yi ngaha e pi Ebhe-o. I də me u nde abhəle ma-a, bhobhomə-o də maka makiso gba ma inde ma a'o e pí bhende gba yi-o. I də mo-o, ma adú ne djali, ní tsia kpí djali ne ndə yi hana bhú dabilí bini. 18<sup>18</sup> A ayo me ngayi di-e, yi də ne djali, amba yi kpi djali ne ma bhú dabilí bini.

<sup>a</sup>2:8 Nakpi ka e: Nani bhú nedhinga gba omaYuda-a, u adú bha nani nagi li kulusi ongbengbe obhəla 'zi.

<sup>b</sup>2:10 Asa doto: A ngasuno kúti gba okpála inde amu.

## Polo atima Timoté bhú Filipo

<sup>19</sup> I dɛ me Ngámá Yesu nde akúnda-a, ma ne 'to ma me ma tima Timoté agba yi sɛnda 'kpí inde, ngɛbula me aní gie lie-e, aní de kpokpo ngali gba yi-e mɛma, amba aní teteke bua ma maka aní adjí di nateteke bua yi lie-o. <sup>20</sup> Kpála koko ka ma ei ade inde ngabhundja maka ma, a ko bha bini aní. Aní a'o bua e kɛkɛlɛ lí 'ngú gba yi-o. <sup>21</sup> Ndɛ okpála koko hana bha bini nga'o bua o lí ongú gba o makpe, u bhundja bhende gba Yesu Kilisito-o de. <sup>22</sup> Timoté makpe, yi mbila ndjindji me a ko bádha kpála. Ne ma ne aní-e, ya amene kulu nakpokpo \*Bádha Ngali . Aní ateteke ma bhú kulu ango-o maka lí ndíli ateteke 'dyi e lie-o. <sup>23</sup> Ma nga'o 'to ma me ma tima aní agba yi má gala, i dɛ me u nde akodho 'ngú gba ma-a akodho-o. <sup>24</sup> Ma ne nabhuka me, i dɛ me Ngámá nde akúnda-a, ngama di-e, ma anú agba yi oo má gala!

## Polo agie Epafalodite bhú Filipo

<sup>25</sup> Ndai ma Epafalodite inde yi atima nako e me aní go teteke ma lí ndɛ ongú bhende aneke ka ma-a, ya amene kulu ne aní bhú dabilí bini. Ya agɛ egá ne aní bhú dabilí bini. La mbia inde-e, ma abhundja me a ndjindji me ma gie aní pí yi. <sup>26</sup> Aní ne gɛmɛ naali me ní u matá ndɛ yi hana. Bua aní adɛ nako abhúlá, anga aní adje me yi ambila me adɛ nako lí ní ne kuo. <sup>27</sup> A na paká me a adɛ nako lí aní ne kuo masakpe de nakpi. La-a, Ebhe asuno bádha bhú 'bu gba e pí aní. Ebhe suno bha bini bádha bhú 'bu gba e pí aní de, aní asuno di mɛma ngɛbula me ma asía matá líkabhu pí koko nane mane de.

<sup>28</sup> Kaka-a, bua ma alɛ abhúlá má gba me ma gie aní pí yi, yi u matá aní, yi tsia kpi djali, amba mɛma-a, bua ma tsia kɛ. <sup>29</sup> Lí aní akólo lie oo, yi de sia aní ne djali anga a ko ndai yi bhú 'bu Ngámá. A ayo me yi manga ngua okpála bhende maka aní-e mamanga, <sup>30</sup> anga aní di me kpi nako lí tɛla kulu gba Kilisito-o. Aní kpe kuo de, aní ateteke ma bhú da yi, maka a ayo nako lie me yi mene ngayi makpe, i dɛ me yi dá nako sɛ-o.

## Lele nadɛ ngbingbili kala Ebhe

**3** <sup>1</sup> \*Ondaise ma, 'li ma na soso pí yi-e ngae inde. Yi kpi djali anga yi ne okpála gba Ngámá. Ongú nako ma aye e pí yi kalanɛ-o, ma matá bha ngayeye ne toto. Ndala lí ma tété ade, la pí yi-e, a ngɛbula nato masi bhú yi ne kalanɛ. <sup>2</sup> Ma apa pí yi me, yi lila liyi ka okpála inde ngamene sisiti kulu-o malila. A ko obúlɛ. U bha bini ngau ngbɛngbé engú nato okpála bhú gandja. <sup>3</sup> Nganí-e, ní ne okpála inde ngakodho kɛkɛlɛ gandja-a nganí, anga ní ngamene kulu líní pí Ebhe ne angu gba \*Bu Bhobua . Ní ne gindaginda anga ní ne okpála ka Yesu \*Kilisito . Ní 'o bua ní lí ongú inde ngayie ka okpála-a de.

<sup>4</sup> I dɛ me adɛ lí ongú ango-o ne tata-a, ma de a'ó di bua ma tété. I dɛ me kpála bini nde abhundja me ní tí da na'o bua ní lí ongú ango-o, ngama-a, ma ambila me ta na'o bua ma tété ene bhende gba aní-e mane. <sup>5</sup> Ngama-a, ma ne kɛkɛlɛ Ebele, azu ma ne oEbele. Ma ne mafsalaele, bhú piga gba Bendjame. U azu ma lie, u ato ma bhú gandja pita 'kpí madjina.<sup>d</sup> Lí 'ngú bhende atsia lílí gba omaYuda-a, ma nako ne \*mɛFalisai . <sup>6</sup> Lí 'ngú bhende atsia nakpata lílí gba ní-e lí lelele-e, ma adɛ nako nato mbolo lí omakilisito. Lí 'ngú bhende atsia \*nadɛ ngbingbili inde lí u aye e bhú olíli gba ní omaYuda-a, ma akpata ndɛndɛ hana má kpɛkɛbhɛ, ma tí belegɛ lí sɛsɛka de bini.

<sup>7</sup> Ma adɛ nako abhundja me ongú bhomɛ-o tí da nateteke ma. La-a, kabula Kilisito, ma au ndɛndɛ hana padhá. <sup>8</sup> Ma au ndɛ oehɛ inde adɛ ka ma-a hana me tata tété ade. Padhá de, anga i dɛ me ma nde ambila Ngámá gba ma Yesu Kilisito ndjindji-e, bhobhomɛ-o ane mɛma ne bádha ngae. Ma atse ndɛ 'he hana kabula aní. Ma ngau ongú bhomɛ-o bhú djila ma maka zibotɛ ngɛbula me ma sia Kilisito, <sup>9</sup> di ne me ma dɛ libhomu hana pí aní. Ma pá matá de me ma ngbingbili kala Ebhe anga ma ngakpata lílí gba omaYuda-a de. Ehe inde nga'o ma ngbingbili kala aní-e, a ko mangbo ma abhuka Kilisito lie-o. Ebhe amene ngae

<sup>d</sup>3:5 Pita 'kpí madjina: A akúnda napa me pita 'kpí mananika u azu ndíli lie.

me ma kolo ngbingbili anga ma abhuka ani. <sup>10</sup>Ma akunda bha koli 'he bini. Ma akunda me ma mbila Kilisito, a la di-e me ma mbila angu inde azuku ani-o. Ma akunda la di me ma za likabhu maka ani azu nani lie-o. Ma tsia du bedhe ngu nakpi pi ani maka ani akpi nani lie muma-o, <sup>11</sup>ngubula me i du me Ebhe nde akunda-a, ma de zuku di maka ani.

<sup>12</sup>Ma abhi 'kpa ma pi mbulu ma de me ma asia oehe bhomu-o asia, di ne me ma akolo ali soso akolo-o de. Engu bini, ma ngamene ne kpeke me ma sia oehe bhomu, anga Yesu Kilisito aholo 'kpa ma makpe ngae. <sup>13</sup>Ondaise ma, ngama-a, ma pa de me ma asia oehe bhomu-o asia de. Koli 'he bini inde ma ngamene e-e, a ko napa me ma 'ili 'to ma li ongu bhende akodho 'kpi akodho-o, amba ma mene ne kpeke me ma nu ne kalanu. <sup>14</sup>Ma ngagu holo ne kalanu ngubula me ma kolo li bili inde ma a'o bua ma lie-o, amba ma sia makala li Ebhe nga'i ni ngu e abhula, kabula engu inde li Yesu Kilisito amene e pi ni-o. <sup>15</sup>A ayo me, ngani obhende inde abhele li kpadji gba Ebhe-e abhele-e, ni du nabhundja moko. I du la me kpala koko nde ngabhundja kpi-e, Ebhe ambamba tata pi ani mambamba. <sup>16</sup>Belegu i du bha pi-ie, ni kpata bha kpadji inde ni akpata e nakolo pi mbia inde-e ko.

<sup>17</sup>Ondaise ma, ndu yi hana yi kpata nganda ma. Yi banga djila yi li okpala bhende ngadhuku maka ya apana lie pi yi ko. <sup>18</sup>Ma pa mo-o padha de, anga okpala bhele ngadhola maka obhulu yala gba Kilisito kabula nakpi ka ani li kulusi-o. Ma apa 'ngu bhomu-o pi yi bhutsibhutsi. La mbia inde-e, ma mata ngapapa ne ngula bhulu djila ma. <sup>19</sup>Li 'so 'kpi-e, u anu bhulu djua. Padha de, anga ebhe gba uo-o, a ko 'bu uo. Uo ne gindaginda li ongu inde a ayo me u dje namu li e-o. U bha bini ngabhundja ongu na doto. <sup>20</sup>La pi ni-e, kuti gba ni-e abhula. Ni ngadjeke Ngama gba ni Yesu Kilisito, inde di mukobho gba ni-e me ani yie abhula, amba ani go. <sup>21</sup>Ani ago lie, ani ayipa kute ni na mbolo inde-e me akolo maka kute ni na angu. Ani amene mo-o ne angu inde ani di ngako angu e pi ndu 'he hana ne e-o.

**4** <sup>1</sup>I du mo-o, \*ondaise ma na mukunda, yi lu kpekpeke bhulu Ngama. Ma kunda yi naali, ma ne gumu me ma u mata yi. Ma ngakpi djali kabula yi, ma la di ne gindaginda kabula yi.

#### Polo aha olili na soso

<sup>2</sup>Kikiliako, Evodia ne Sitika, ma ayo ka yi me yi du ne \*guo 'ngu sunda yi, anga yi ne okpala gba Ngama. <sup>3</sup>Ma ayo di ka mu ndai ma na mukunda, teteke olisi bhisi bhomu-o mateteke, anga ya amene kulu ne uo kpekpeke, ya atsia azu di likabhu ne uo bhulu dabili bini ngubula \*Badha Ngali, di ne Kelema, a la di-e ndu ondaise ma koko hana inde ya amene kulu gba Ngama ne o ko. U aye ndu 'li uo hana bhulu bhuku na mukobho.

<sup>4</sup>A ayo me yi kpi djali ndu 'kpi hana anga yi ne okpala gba Ngama. Ma mata ngapapa ne toto me, a ayo me yi 'kpi djali. <sup>5</sup>A ayo me yi du ne bhuku bua pi ndu okpala hana. Yi mbila hana me Ngama ago mbia. <sup>6</sup>Bua yi aguku belegu ka 'ngu bini de, engu bini, yi yo mangbo ka Ebhe ndu 'he hana yi nde ne gumu e-o. Yi yo ani bhulu nedhinga hana. Yi yo ani, amba yi gie heni pi ani. <sup>7</sup>I du me yi nde amene mo-o, li Ebhe ha guo 'ngu gba e inde ane ndu imbilangu hana-a pi yi. Guo 'ngu ango-o alila bhobua yi bhulu dabili bini di ne mabhundja gba yi-e, anga yi ne okpala gba Yesu \*Kilisito.

<sup>8</sup>Ondaise ma, 'li ma na soso pi yi-e ngae inde: a ayo me yi mbila liyi ne nabhundja pindji obabadha ongu, li okpala atotoko e-o. A ko 'ngu inde li eu nde bhulu e ade, engu inde ngbingbili, engu inde li zibotu nde bhulu e ade. A ko 'ngu inde nganga li okpala, engu inde li lelele. <sup>9</sup>Ongu inde ma akpokpo e pi yi, inde yi aziba e, ongu inde yi adje e bhulu 'bhe ma, yi au ma ngamene e-e, yi mene ongu bhomu. Abhomu-o, Ebhe inde ahaha guo 'ngu pi ni-e du bhulu dabili bini ne yi.

Polo agie heni ngɔbula oehe inde u atima e pi ani-o

<sup>10</sup> Ma ngakpi djali naali bhú Ngámá anga yi amata abhundja ma. A na paká me yi adu nako nabhundja ma kalanu. Engú bini, kpadji du nako de me yi teteke ma-a de. Nedhinga ane la bhadi naali me yi nde teteke ma de. <sup>11</sup> Ma pa mo-o ka 'ili de me ma bhú ndibhili-e de. Padhá de, anga ma ambila lima ne ngáli nganda ma bhú ndu nedhinga hana. <sup>12</sup> Ma ambila lima ne nakobho bhú ndibhili, ma ambila di lima ne nakobho bhú nedhinga li ehe nde lie ka ma bhelé. Ma ambila lima ne ndu ndjindji ne ndu bili hana, ne bhú onedhinga hana, belegu li ehe nazu mazú du ka ma, belegu li nedhinga na gumu, belegu li ehe du ka ma bhelé, belegu ma du bhú ndibhili. <sup>13</sup> Ma ti da nakibila ndu ongu bhomu-o hana ka angu gba Yesu Kilisito inde bhú ma-o. <sup>14</sup> Belegu inde lie mo-o, yi amene ndjindji ngɔbula nateteke ma li nedhinga ma ngazu likabhu lie-o.

<sup>15</sup> Ondaise ma na gadhu na Filipoi, yi mbila hana me nedhinga ma abhuka nakpokpo Bádha Ngali lie bhú ndu doto gba yi na Makedonia-a, ateteke bha bini ma ne Dadjua gba yi-o. Dadjua koko bini ade inde ya amata 'kpa ya ne e. <sup>16</sup> Padhá de, anga ma adu lie bhú Tesalonike-e, yi atima ehe inde ma adu ne gumu e muma bhatsibhatsi. <sup>17</sup> A ko de me ma ngagili makalá-a de. Engú bini, ma ngagili mangbo me Ebhe suno bádha bhú 'bu gba e pi yi ane mane ka ohe yi ngaru e muma-o. <sup>18</sup> Ma asia ndu 'he hana inde yi atima e muma-a, ane belegu bhende ma adu ne gumu e-o. Li ma au ohe li Epafolodite ago muma ne e lie, ehe bini neke matá ka ma de. Oehe angu-o maka makiso inde u ahaha e pi Ebhe, inde li se e nde li Ebhe ndjindji, inde di nganga li Ebhe manga. <sup>19</sup> A ka Ebhe gba ma-a ne bhiti ehe na bhibhiti. Ani ahá pi yi ndu 'he hana yi nde ne gumu e-o. Ani ahá pi yi li kpadji gba Yesu Kilisito. <sup>20</sup> A ayo me u dhoge Ebhe 'Dyi ní daduma ne daduma. A adu moko!

Polo abhana lie pi omabhuka na Filipo

<sup>21</sup> Yi yi ndu okpála hana inde li Yesu Kilisito abhu o me u du ne okpála gba ni-o. Ondaise ní ya nde ne o ei-e, yi di yi mayi. <sup>22</sup> Ndu \*omabhuka koko hana inde ei yi yi mayi, ane la mane obhende ngamene kulu bhú 'ti gba 'ngbé ngámá na \*Loma \*Kaisala-o .

<sup>23</sup> A ayo me Ngámá Yesu Kilisito suno bádha bhú 'bu gba e pi yi.